
MARIA DE VENTADORN.

S.^o Palaye. manusc. du Vatican 3207.

Ben avetz auzit de madompna MARIA DE VENTADORN com ella fo la plus preziada dompna qe anc fos en Lemozin, e aquela qe plus fetz de be e plus se gardet de mal. E totas vetz l'ajudet sos senz e. follors no ill fetz far follia; et onret la deus de bel plazen cors avinen ses maestria.

En Guis d'Uisels si avia perduda sa dompna, si com vos aves ausit en la soa canson que dis :

Si be m partetz, mala dompna, de vos, etc.

don el vivia en gran dolor e en tristessa. Et avia lonc tema q'el non avia chantat ni trobat, don totas las bonas dompnas d'aquella encontrada n'erou fort dolentas; e madompna Maria plus qe totas, per so qu'en Guis d'Uisels la lauzava en totas sas cansos. El coms de la Marcha, lo cals era apellatz n Ucs lo Brus, si era sos cavalliers, et ella ll'avia fait tan d'onor e d'amor com dompna pot far à cavallier. Et un dia el dompnejava com ella, e si agon una tenson entre lor; qe'l coms de la Marcha dizia qe totz fis amaire; pos qe sa dompna li dona s'amor ni l pren per cavalier ni per amic, tan com el es lials ni fis vas ella, deu aver autan de seignoria e de comandamen en ella com ella de lui. E madompna Maria defendia qe l'amics no devia aver en ella seignoria ni comandamen. En Guis d'Uisels si era en la cort de madompna Maria; et ella, per far lo tornar en cansos et en solatz, si fes una cobla en la cal li mandet si se covenia qe'ls amics ages eitan de seignoria en la soa dompna, com la dompna en lui. E d'aqesta razon madompna Maria si l'escomes de tenson; e dis en aissi :

2701, 7698, C.

GUI d'Uisel, be m peza de vos
Quar vos es laissatz de cantar,
E volgraus i enquer tornar.
Equar sabetz d'aitals razos,
Ieu vos deman si deu far engalmen
Domna per drut, quan lo quier francamen,
Com el per lei tot quan tanh ad amor,
Segon lo dreg que tenon l'amador.

Domna na Maria , tenses
E tot cant cujava laissar ;
Mas aoras ne pesc mudar
Qu'ieu no cant à vostre somos.
E respon vos de la domna breumen ,
Que per son drut deu far comunamen
Com el per lei ses garda de ricor :
Qu'en des amics non deu aver major.

Gui , tot so don es cobeitos
Deu drutz ab merce demandar ;
E domna deu lo autrejar ,
Mas deu ben esguardar sazos.
El drut deu far pres e comandamen
Com per amigu' e per domn'eissamen ;
E domna deu à son drut far honor
Com ad amic e no com à senhor.

Domna , sai dizen entre nos
Que lai on domna vol amar
Engalmen deu son drut honrar ,
Pois engalmen son amoros.
E s'esdeve qu'ell' am plus finamen ,
Li dig e'l fag o devo far parven ;
E s'a ves leis cor fals ni trichador ,
Ab semblan bel deu cobrir sa dolor.

Gui d'Uisels , ges d'aitals razos
No son li drut al comensar ;
Ans dis quascus , quan vol pregar ,
Mas junchas e de genolhos :
Domna volhatz queus serve humilmen
Com lo vostr'om. E s'ell' enaissi l pren ,
Ieu lo jutge per dreg à traïdor
Si s ret pariers e s det per servidor.

Domna , ben es plaigz vergonhos
Ad ops de domna razonar ,
Que celui no tenha per par
A cui a fait un cor de dos.
O vos diretz , o no s'estara gen ,
Que'l drutz la deu amar plus leialmen ;
O vos diretz que son par entre lor ,
Que re no l deu lo drutz mas per amor.
